



Forsit i gnûfs Contecurtârs no lu savaran, ma su Contecurte, ogni tant, o vin gust di lassâ une ispirazion pes Contis. Cun la ricorince dal 2014 us lassin cheste, in grazie al contribût di Carli Pup.

Ai 28 di Lui dal 1914, dopo dal

sassinament dal arciduche Francesc Ferdinand, l'imperi di Austrie e Ongjarie al declarà vuere ae Serbie. Tal zîr di une setemane il conflit al veve za cjapât dentri dutis lis potencis europeanis: Russie, Gjermanie, France e Ream Unît. Si inviave cussì chê che e je stade batiade Prime Vuere Mondiâl e che si sierarà cuatri agns plui tart lassantsi daûr milions di muarts e butant za lis semencis pal secont conflit mondiâl.

Ator pe Italie si le clame la

Vuere dal '15-'18, ma pal Friûl il conflit al scomence za l'an prime. Za tal '14, di fat, a partissin pal front uns 30 mil furlans che, cu la divise imperiâl, a van a combati soledut in Galizie. Un pôcs di lôr, presonîrs dai rus, si cjataran ancje tal mieç de rivoluzion di Otubar. Chei altris furlans, chei cu la monture taliane, a laran in vuere un an plui tart.



Il conflit però no si contente

dai furlans clamâts a combati, ma al glot dentri dut il Friûl tant che linie dal front o tant che retrovie. Il Friûl al paie un presit ancjemò plui alt come

tiere ocupade: il Friûl orientâl dai talians tra il '15 e il '17, il rest dal Friûl dai imperiâi tra il '17 e il '18. Tal prin câs i furlans che a vevin di jessi 'liberâts dal jôf forest' a son tratâts come nemîs, cun centenârs di civîi internâts (dome tal distret di Çarvignan si 'nt conte plui di 350) o cun episodis di brutalitât di stamp coloniâl come a Vilès, là che a vegnin copâts 6 civîi e altris 150 a son depuartâts. Tal secont câs si cjatìn fintremai denant di une crevadure drammatiche tra i furlans, cun chei che a cjapin la strade de profugance (si fevele di passe 100 mil di lôr) e chei che a restin tal Friûl ocupât e che a saran po cjalâts cun suspriet dopo dal '18 cuasi che a fossin dai traditôrs.



Finide la vuere il Friûl al à di

fâ i conts cuntune sdrume di muarts, mutilâts e ferîts no dome framieç dai soldâts, ma ancje tra i civîi. La sô economie e je fiscade: plui dal 80% dal patrimoni industriâl al è sdrumât intune cun tante part des infrastruturis, il 90% dal besteam al è stât copât o robât, lis ricueltis a son ruvinadis o puartadis vie (ma i parons a pretindin distès che si pain i fits). La sconfite dai imperis centrâi e siere ancje la strade de emigrazion stagjonâl sù pes Gjermaniis. Intal Friûl orientâl, anetût dopo cinc secui di partignince ae cjase dai Asburcs, la aministrazion e je lassade intes mans des autoritâts militârs. Al è ta cheste suaze che si jevin lis primis vôs che a fevelin di autodeterminazion e che, soledut, si dan adun lavoradôrs e disocupâts cun mobilitazions, protestis e siopars che a fasin pensâ che la rivoluzion e sedi pronte par sclopâ. Ur rispuindaran prime lis fusiladis dal esercit e dopo lis spedizions des scuadratis neris.

A cent agns dal sclop di chê vuere, fûr di ogni retoriche e di ogni celebrazion, a 'nd è storiis pardabon di ogni sorte che si puedin contâ, che a

coventin contadis. Ancje chi su Contecurte.

***Ispirazion metude adun di Carli Pup***

*Intes fotografîs, Rivignan, Madrîs e un puint provisorî sul Tiliment*